

## PLURALICJ MA UNÎTS PAL BEN DAL FRIÛL

Cjar pre Antoni,

tu sâs che jo o soi un abonât fedêl de «Patrie dal Friûl», come de «Vite Catoliche». Sun chesc' doi sfueis o ài vût scrit no di ideologjîs ma sun duc' i problemis e i lôr valôrs che dal 1976 – cuanch' o soi stât elet ae Cjamare dai Deputât di Rome - o ài puartât indenant e inviât a soluzion, des lez pe ricostruzion dal taramot, pal svilup dal Friûl, par ridusi lis sclavitûts militârs, par sfrancjâ la nestre tiare e il so popul des armis nucleârs, pe pupulance de lenghe e de culture furlanis, pe incessite de cooperazion economiche internazionâl in Friûl e cussì indenant.

Sun chesc' sfueis, in man di predis di valôr - ancje se tu tu sês chel da lenghe plui sclete e sincere - jo mi soi cjatât sinpri in largje sintonie sun chesc' problemis a favôr dal nestri popul e dal nestri Friûl, par tant timp dal Stât talian regolamentri dismenteâts, fûr che pes vueris e par tirâ sot valude preseade dai emigranz.

Chest al à podût sucedi tra me – ch' o soi un esponent comunist - e i citâz sfueis catolics parceche la Glesie furlane, dopo dal concili di pape Zuan e il document dai predis de Diocesi di Udin dal 1975, si è distacade dal servissi al partît de democressie cristiane par meti come fondis de sô presince te societât i valôrs dal om di vuè e lis cuistions viartis dal popul furlan, decidint, ancjemò, di clamâ duc' a puartâ un modon per lôr soluzion, di rispietâ lis sieltis politicis dai oms e ricognossint, duncje, che ancje «gli erranti» a partin daursi valôrs positîfs pal distin dal om in tiare.

Cheste evoluzion e jè lade indenant insieme cu lis grandis novitâts dai comunisc' talians che - unics tal mont - e vevin ricognossût che la «sofferta coscienza religiosa», invessit di jessi «oppio dei popoli», e pues jessi di stimol al inpegn dai catolics pe cause de pâs, par tirâ sù une societât plui juste, pal avignî dal om e de umanitât

Poben, la letare che Feo a ti à scrit par parâ don Rinaldi cuntri Zuan Pressac (cjapant a rinpîn il teribil fat di Polonie, mai avonde condanât), e dimostre clare no dome la voe di tornâ indaûr e di tornâ a fâ sclave un'âtre volte la Glesie furlane - ma ancje chê taliane - dal Partît democristian e de sô politiche, ma ch' al è piês, di volê scancelâ lis novitâts, di dividi e di rindi plui debulis lis fuarcis ch' a cirin di incuntrâsi parsore lis cisis, par strengisi lis mans e sigurâj il miôr avignî al om.

La tô rispueste a Feo di Bean, come chês âtris publicadis dal to sfuei, a son claris testimonianceis che pai tanc' Feos ch' a girin pal Friûl e pa l'Italie, dentri e fûr de DC, e sarâ dure a ripuartâ la «normalisazion», forsît come a Jaruzelski in Polonie.

Almancul cussì o speri e par chest intent o vin di lavorâ duc'. Mandi. To

Arnalt Baracêt  
deputât dal P.C.I.

*Ti ài agrat pe testimoniance che tu mi dâs. O podìn pensâle cemût ch' o volìn, ma no podìn molâ sul pluralîsin, ch' al ûl dî acetâ la veretât, ancje a riguart dal om e dai siei progjets, e jè trassendentâl. Tant a dî che nissun no le*

*à te sachete e che duc' o vin di fâ ogni dî un pas indenant tal servî la cause de libertât e de dignitât ancje in chest mont. Se podopo un al à la grazie di viergisi a di une veretât plui plene, nuje di miôr. Ma cheste no jè une robe che pò dâle la DC e nancje nissune istituzion di chest mont.*

*Tal pluralîsin di stradis, o vin di vê une unitât: servî l'om, chî, in Friûl. E metint lis ideologjîs a servîssi dal om e no l'incontrâr. Però, come ch'and'è pôs predis (amancul uficialmentri) che le pensin come me, o scrùpuli ch'a setin pôs i comunisc' che le pensin come te. Si sa che l'istituzion e cope e lis nestrîs dôs glesiis, la mê e la tô, in fat di dogmatîsin, a son tremendis. Par chel amancul nô cirî di lâ indenant par cheste strade. E in chest, tocje dâti at, la tô coerense e passion a son esenplârs.*

*Setembar 1985*

*pre Antoni Beline*